

東
華
續
錄

京華續錄

道光二十七年

臣王先謙敬編

臣周瀚蕃恭校

道光十三年癸巳春正月丁丑諭軍機大臣等本日據劉廷斌由
四百里奏報生擒逆首陳辦並拏獲偽帥股首分別辦理一摺所
辦甚合機宜朕心嘉悅此次嘉義紳民困守五十餘日兵勇屢次
殺賊奪礮焚巢官民依繫若家人父子該縣紳民深堪嘉尙著瑚
松額程祖洛查奏候旨施恩所有拏獲偽帥賴和尚及羅雲章黃
城暨逆首陳連及在彰化拏獲張臨等各犯俱著瑚松額程祖洛
確切查明員弁兵丁義勇候朕懋賞其嘉義新南港總理林振賢
等督率莊民林欽瑞等生擒逆首陳辦可嘉之至見在四逆俱擒
張丙前已有旨解京其陳辦陳連二犯著卽派委委員迅速解京

盡法懲治以彰國憲而快人心其詹通一犯據劉廷斌奏同張丙
一處管押亦著一併解京其匪匪應按捕者務須盡絕根株著瑚
松額會同劉廷斌馬濟勝妥爲辦理其善後事宜最關緊要本係
地方官之責其焚毀村莊應安撫者務須妥爲安輯若不趁此時
辦理妥協將來大兵歸伍或尙有餘匪竊發朕惟程祖洛是問至
劉廷斌於該處安輯後應赴廣東新任卽著劉廷斌自行酌量察
看該處地方安靜無虞再行起程前往可也○調湯金釗爲戶部
左侍郎何淩漢爲吏部右侍郎以姚元之爲工部右侍郎由內閣學士遷
○福建提督馬濟勝奏到臺日期並查探賊匪情形得旨初到之
時所見皆是故能以少勝眾不煩內地兵力而奏膚功可嘉之至
又奏飭副將謝朝恩等卽帶兵赴彰化協剿以分賊勢批彼時光
景不知汝何等著急也可嘉可念○丙申以畿輔上年歉收撥京

倉粟米三千石發大興宛平縣屬設廠煮賑○濬京師九門護城

河並內城河道以工代賑○丁酉楊懌曾以病免以麟慶爲湖北

巡撫額騰伊爲貴州布政使調怡良爲江蘇按察使以蔡世松爲

安徽按察使

由唐鳳道選

○庚子方載豫年老休致以光聰諧爲甘肅

布政使陳崇禮爲直隸按察使

由長蘆鹽運使選

○辛丑諭本日朱士彥

等由四百里馳奏桃南廳于家灣合龍壩工蟄鎮穩定關門邊埽

堵閉情形並將在工出力人員懇請鼓勵一摺向來辦理河湖各

工遇有潰決處委係險工疊出猝不及防人力難施事竣後在工

人員著有勞績自應給予議敘至上年龍窩汛十三堡奸民聚眾

強挖官隄該管各官漫不經心疏於防護以致奸民陳端等明目

張膽執持器械攔截行人捆縛巡兵將大隄刨挖殊出情理之外

此次壩工穩定邊埽堵閉各該員縱有微勞亦屬分所應爲之事

非愿次大工可比若濫邀議敘尙復成何事體朱士彥等所請懇
予鼓勵之處著不准行首犯陳端起意糾眾罔隄日久未獲殊屬
延玩著陶澍林則徐嚴飭所屬勒限緝拏務獲審辦不得以于家
灣業經合龍河身已復故道置之度外如緝捕鬆懈致要犯日久
稽誅陶澍林則徐恐不能當此重咎也張井等若無頂帶不足以
資彈壓張井著加恩賞給四品頂帶王貽象張兆薛朝英著加恩
賞給五品頂帶均著仍帶革職留任八年無過方准開復

二月壬寅朔以吳傑爲順天府府尹王瑞徵爲貴州按察使

鎮江
縣道

○甲辰

上御經筵

○乙巳

以程恩澤爲內閣學士兼禮部

侍郎銜

由祭
酒遷

○丙午以直隸米價增昂發倉穀設廠煮賑

○己酉

以楊殿邦爲貴州按察使

由廣東
道遷

○癸丑諭軍機大臣等姚元

之奏臺灣營務亟宜整頓一摺臺灣合漳泉潮粵之民而聚處尋

費逞忿勢所不免其俗剽悍浮動好事當無事時有人立市一呼
今日搶某處某家頃刻之間從者數百絕不爲怪此風斷不可長
南路有鹿耳門北路有鹿港有八里坌無票之人槩不准渡弁兵
不免賣放之弊一船恒數百人其沿海僻靜處所在在可以偷渡
內地遊手無賴及重罪逋逃之犯潤迹其閒臺民利其傭不取值
多樂容之及不足相養乃羣起而爲盜是臺灣盜賊之多實由於
此地方大吏必須嚴密稽查以杜其源所奏臺灣一鎮設班兵一
萬四千六百有奇到臺卽住宿倡家日以聚賭爲事攬載違禁貨
物欺虐平民官若查拏輒鼓噪欲變甚至械鬪殺人不服地方官
申理不聽本管官鈐束違禁犯法無所不爲而水提金門二標爲
尤甚又有身列行伍不事訓練每操演時本地別有習武匪徒專
爲受雇替代設有奸宄滋事卽依附爲其兇黨種種積弊尤爲可

惡國家費如許帑金養兵衛民所以戢奸禁暴如該侍郎所奏窩倡聚賭械鬪殺人不服約束尙復成何事體至營中操演有受雇替代之弊則是我兵竟作壁上觀而此輩無藉遊民性本獷悍而又習之以戰鬪假之以凶器豈不相率而爲盜耶該鎮將等若竟昏庸毫無聞見則爲形同木偶或竟知而不辦則是喪盡天良釀成事端罪無可追程祖洛甫經到任無所用其回護著將摺內所指各情節實力稽查如有前項情弊卽著嚴參從重究辦毋稍姑息此次辦理善後務須大加整頓破除積習妥立章程俾海疆得以永靖方爲不負委任○戊午撥江甯藩庫銀三十五萬兩備淮揚等屬展賑○己未四川越雋廳等處夷匪滋事命那彥寶桂涵等勦辦○已革直隸總督那彥成卒贈尙書銜予祭葬諡文毅釋其子容安回旗○壬戌諭此案庫丁戴雲終因解官不暇同交兌

起意虛立印付侵盜餉銀繼因奎秀等恐虧庫項未允該犯輒敢飾詞懇憑以致阿成等舞弊婪贓實爲此案罪魁藐法已極此而不嚴行懲辦何以儆奸蠹而肅紀綱戴雲峰著卽處斬已革給事中阿成聽信戴雲峰等虛出通關截留侵餉得受賊銀一千兩之多該革員身任查庫御史職司風憲盤點是其專責乃舞弊卽係查弊之人尤出情理之外阿成著卽處絞○甲子以恩桂爲內閣學士兼禮部侍郎銜由詹事遷○乙丑賑臺灣被賊滋擾閩粵難民○再發京倉粟米五十石加賑大興宛平兩縣並添設粥廠○辛未諭軍機大臣等那彥寶等奏官兵疊剿夷匪清溪縣境肅清一摺此次夷匪滋擾經提督桂涵密派將備帶兵馳往沙坪及几子山水桶溝等處截擊官兵行至沙坪三路並進奮勇攻擊斃賊千餘人零匪分散次日移營富林汎聞山後香樹頂有賊派兵馳剿左

右兜擒殺賊百餘轟斃亦多餘匪奔竄進勦几子山該處係賊匪
眷屬藏匿聚匪無多旋赴水桶溝接捕該處係馬林住居寨堡山
梁險峻槍礮轟擊斃賊二三百人馬林房屋當卽焚毀又有阿吾
一支夷匪約千餘人占踞山梁前來攻撲官兵三路繞道前進轟
斃落巖無算餘匪從後山逃竄提訊各犯據供馬林等意欲奪回
漢民地畝分給耕種我們亦因漢民太多占住地方是以隨同焚
搶至清溪縣避難民人漸次復業該匪並不占踞屯集沿途禾苗
亦未蹂躪辦理迅速頗合機宜前經降旨令那彥寶前往督辦清
溪見已肅清那彥寶可以無庸前往惟馬林一犯必應拏獲重懲
著該提督設法搜擒以淨根株阿吾地方亦須屯兵以遏分竄之
路勿任漏網其大樹堡夷匪畏懼斂迹峩邊一路派兵防堵俟清
溪夷匪殲除卽往查辦俾夷疆一律震讐○是月加賑直隸薊州

等七州縣災民貸陝西漢中等五府州廳貧民倉穀緩徵江蘇泰州等二十二州縣衛通賦葉爾羌等三城災回糧石

三月壬申朔盧坤奏擒獲粵洋盜首楊就富等○乙亥 上親耕

藉田○丙子諭富俊奏請將各部院衙門條例定議畫一俾知道

守並請敕臣工認真辦公一摺各部院衙門例案隨時酌量增改

自須各定專條俾知遵守原不應界涉兩歧致書吏得以藉端舞

弊嗣後各衙門於纂修則例時務須悉心酌議將兩歧例案悉予

刪除總不得彼此通融互可援引致令不肖吏胥從中舞弄庶足

以昭畫一又所稱臣下辦公不當虛應故事如有顛預怠玩者當

卽懲儆等語見在諸大臣認真辦事者原不乏人卽偶有未能振

作者朕亦隨時訓飭未嘗稍事姑容諸大臣尤須體朕勵精圖治

之心實力奉公各盡厥職以熙庶績而臻上理○允大學士盧蔭

溥致仕加太子太保在籍食俸○辛巳 上閱火器營兵○乙酉

四川提督桂涵卒於軍贈太子少保賞治喪銀五百兩予祭葬諡壯勇○丙戌展五城飯廠煮賑一月○己丑命直隸興修水利以工代賑○癸巳予臺灣死事縣丞方振聲諡義烈署守備把總馬步衛諡剛烈陳至威諡勇烈均加銜給世職入祀昭忠祠並命建專祠於斗六門以屬賊抗節振聲妻張氏步衛妻唐氏均諡節烈及從難幕友家人附祀○丙申諭盧坤等由驛馳奏生擒越南巨盜陳加海匪巢盡掃華夷洋面肅清一摺此案越南國奸民陳加海卽阮保與內地遊匪楊就富均在夷洋狗頭山嘯聚陸續擄倡多人入夥共船三十六隻四出行劫先經遊擊林鳳儀等帶領兵船駛赴夷洋圍捕都司余靖生擒楊就富並獲夥犯多名其陳加海船撞礁擊破帶妻屬伙伴逃入深山茲據奏稱越南土目稟報

生擒陳加海卽阮保並匪黨阮文軍等男婦十一名口押回州屯
檻禁並據商船壯勇宋敬利陳金發知首犯已獲遂轉至青藍山
按獲餘匪陳亞幅等七名斬匪目黃矮二王亞二首級通判陸向
榮等按獲逃匿犯王亞大覃大業二名署瓊州鎮謝德彰等在
竹山一帶獲解匪犯黃沅洗等十餘名其文武委弁獲解匪黨張
亞德等二十餘名並經廉州府知府張埈春究出此股洋匪尙有
出海爲盜主謀之林致雲見在冠頭嶺外洋遊奕窺伺經該府密
飭員弁前往躡拏獲解來府提同各犯質證究出行劫實情尙屬
能事提督李增階見駐儋州督飭參將林開疆等文武緝獲吳亞
麟等十七名並船隻鐵礮越南國藤牌等件賊巢已埽渠魁就獲
華夷洋面全就肅清辦理甚爲妥速覽奏欣悅著盧坤等卽提集
見獲首從各犯嚴訊確情按律從重定擬毋稍寬縱其在事出力

文武員弁著盧坤等擇其尤爲奮勉者秉公酌量保奏候朕施恩毋許冒濫○戊戌調姚元之爲刑部右侍郎以廖鴻荃爲工部右侍郎由內閣遷○張井以病免以麟慶爲江南河道總督鄂順安爲湖北巡撫調裕泰爲刑部右侍郎由盛京工部侍郎調○庚子雨○是月貸直隸紫荆關營兵奉天錦州府屬兵丁湖南乾州等五廳縣屯丁苗佃倉穀緩徵山東積欠錢糧山西山陰定襄二縣歉收新舊額賦展緩長蘆山東各商通課

夏四月辛丑朔調鄂順安爲山西巡撫尹濟源爲湖北巡撫○丙午太子少保前任伊犁將軍玉麟卒晉太保入祀賢良祠賞銀一千兩治喪○丁未大雨○戊申以蘇成額爲熱河都統貴慶爲漕運總督調恩銘爲倉場侍郎松筠爲工部左侍郎轉聯順爲理藩院左侍郎以賽尙阿爲理藩院右侍郎由內閣學士遷○己酉命潘世恩

爲體仁閣大學士調朱士彥爲吏部尙書以白鎔爲工部尙書湯金釗爲左都御史調何淩漢爲戶部左侍郎李宗昉爲吏部右侍郎張鱗爲戶部右侍郎以朱爲弼爲兵部左侍郎由左副都御史遷○庚申麟慶丁憂以張井暫署江南河道總督○辛酉 上奉 皇太后臨視 皇后疾○壬戌諭福建臺灣逆匪滋事提督馬濟勝劉廷斌會同勦辦殲擒賊匪多名曾降旨將該提督等賞戴雙眼花翎交部優敘茲據瑚松額等查明上年冬閒逆匪張丙等聚黨分股戕害官弁惟時全臺官兵有一萬四千餘名之多劉廷斌嬰城固守請調兵三萬速赴救援馬濟勝帶兵二千渡臺接仗所向克捷賊匪紛紛潰散各股逆首陸續就擒大股戡定見在搜捕零匪剋期蕝事全臺得臻安謐朕思上年湖南廣東勦辦猺匪提督羅思舉余步雲俱屬奮勇出力特沛恩施加以懋賞但湖南猺匪滋

事彼時有總督盧坤駐營調度卽廣東猺匪剿撫安速藏功亦係
欽差大臣禧恩瑚松額等會同籌度指示機宜茲者臺灣一役當
瑚松額等未經渡臺以前若非馬濟勝身先士卒有勇知方能以
少勝多殺賊致果則全局事勢不堪設想是馬濟勝之功較之羅
思舉余步雲二人尤爲偉鉅必當優加懋獎篤眷酬庸馬濟勝著
加恩賞給二等男爵世職以示朕諭功行賞權衡至當之意○那
彥寶奏逆首馬林就擒○甲子 上奉 皇太后臨視 皇后疾
○己巳申刻 皇后崩 上親臨視酉刻詣澹懷堂 大行皇后
梓宮前奠酒諭皇后正位中宮事朕二十六年柔嘉維則孝敬無
違此宮中府中所共知者今抱沈疴竟成長逝失此內佐痛何忍
言著派惇親王縣愷總管內務府大臣禧恩禮部侍郎文慶工部
侍郎裕誠總理喪儀○庚午 上詣澹懷堂 大行皇后梓宮前

奠酒至庚辰皆如之午刻奉

皇太后臨奠○是月貸盛京義州

兵米湖南新田縣民徭耕種展緩直隸通州等四十四州縣衛被旱新舊額賦緩徵山西朔州等五州縣歉收新舊額賦

五月辛未朔賜汪鳴相等二百二十人進士及第出身有差○癸

酉調德興爲盛京戶部侍郎以德春爲盛京兵部侍郎

由左副都御史遷

○甲戌以劉韻珂爲浙江按察使

由雲南鹽道遷

○丁丑

上詣澹懷堂

大行皇后梓宮前行殷奠禮○楊芳奏馳抵軍營擬分兵剿辦

夷匪越嵩大樹堡迤東一帶夷巢經將弁等在哈白堡一帶疊次

剿戮匪徒潛匿山嶺應分兵架入以次接捕越嵩一路有兵六千

八百餘名副將何占魁將夷巢殲除過半餘數處夷匪亦多竄匿

因阻雨水尙未周歷留兵二千名責成該副將帶領接捕遺孽撥

兵三百名令遊擊楊麟帶往大樹堡迤南甯越營地方交總兵萬

榮合原帶兵丁五百名共八百名在彼處鎮靜彈壓其大樹堡爲積貯糧石接應各路要隘並防河岸留兵二千一百餘名責成副將馬光宇濬濠建礮爲居民捍衛通共留兵四千九百餘名抽出新疆松潘漢屯官兵一千九百名歸併我邊爲進剿之用報聞○戊寅楊振麟以病免以郭承恩爲廣東按察使

由安徽甯池太廣道遷

○辛

巳 上詣澹懷堂

大行皇后梓宮前行初祭禮釋服○壬午辰

刻 上詣澹懷堂

大行皇后梓宮前行啓奠禮酉刻奉 皇太

后臨奠○諭王以下有頂帶官員以上百日後薨髮軍民人等一

月後薨髮均百日內停止宴會音樂○刑部覆奏兩江總督陶澍

等議覆給事中孫蘭枝奏紋銀出洋請明定例案一條查白銀一

項雖非銅鐵製造軍器者比惟內地物產應供內地之用若私運

出洋則內地轉形支絀應如該督所議另立治罪專條嗣後紋銀

出洋一百兩以上請照偷運米穀一百石以上例發近邊充軍一百兩以下杖一百徒三年不及十兩者杖一百枷號一箇月爲從知情不首之船戶各減一等問擬纂入則例永遠遵行從之○癸未 上詣澹懷堂 大行皇后梓宮前奠酒奉移 大行皇后梓

宮於觀德殿○楊芳奏越巂大樹堡迤東一帶夷匪經副將何占魁帶兵直進老林堡茶林周火山等處搜捕殲匪百餘四月十九日何占魁帶兵裹糧令土司嶺華封導引躡路直抵恰落果果臨日河地方該匪在果果對山抵拒二十日兵分三路攀藤附葛直抵夷巢奮力攻擊殺斃不計其數賊堡百餘悉行焚燒其未滋事各夷隨時撫馭仍安耕鑿見尙有恃險深匿之匪應遠捕窮搜淨其萌孽見在戕邊一路屢被賊匪潛出突殺帶兵啓程馳赴該處將該廳夷匪剋日蕩除報聞○丁亥 上詣觀德殿 大行皇后

梓宮前奠酒○以倭什訥爲內閣學士兼禮部侍郎銜由奉宸苑卿遷○

己丑楊芳奏四川我邊廳夷匪首逆桑樹格等就擒○庚寅諭向來奏事處遇有奏摺總當接收其摺中所陳何事原不應問惟遇形迹可疑亦當留心盤詰將遞摺之人扣留以憑訊辦本日有不識姓名人擅遞封章並將摺匣封口事屬舛見奏事處率行收受並未將遞摺之人扣留以致杳無蹤迹難憑究辦太不成事非尋常疏忽可比與保著交部嚴加議處哈琅阿著交部議處尋降與保三級調用退出奏事處哈琅阿降二級留任不准抵銷○壬辰諭前因惇親王縣愷文慶來園奏事朕俱召見據惇親王縣愷面陳與福恩等共商軍民人等薙髮停止宴會之處於義未協引用百姓如喪考妣四海遏密八音之說惇親王等既有此說是以降旨再交大學士軍機大臣會同禮部詳查例案悉心妥議具奏茲

據大學士長齡等會奏朕詳加披閱內稱乾隆十三年五月二十三日奉 皇祖高宗純皇帝諭旨 孝賢皇后大事一切典禮朕皆斟酌古今務協其宜蓋皇后體原尊貴然以天子之禮視之則節文亦自有別縱令伉儷恩篤亦不可事事從而加厚以致失之太過卽或情誼稍有未洽亦不宜事事從而貶抑以致失之不及朕於 孝賢皇后情誼隆重固天下臣民所共知而經紀喪儀從不肯以一毫私意稍紊典常考明代嘉靖七年孝潔陳皇后之喪閣臣張璉援引古禮以爲喪服自期以下諸侯絕特爲旁期言若妻喪本自三年報服殺爲期年固未嘗絕上宜爲后服期等語其折中頗爲允當今據大學士等奏禮儀內如升殿作樂一節凡屬大朝祀典照例舉行朕意今年內尋常升殿但鳴鐘鼓樂懸而不作庶爲合宜至來年正月將屆期年一切典禮著照康熙十四年

之例如常儀欽此仰見 聖諭煌煌斟酌盡善後世子孫總當恪
遵 成憲不敢以私意稍紊典常是以朕前降諭旨 皇后喪儀
乾隆十三年 皇祖妣孝賢純皇后大事固不敢踰嘉慶二年
皇妣孝淑睿皇后大事尤不敢過與 皇祖高宗純皇帝諭旨不
至失之太過不至失之不及二語實相符合茲惇親王縣愷引用
百姓如喪考妣四海遏密八音之語殊屬不倫蔡沈集傳註云遏
絕密靜也八音金石絲竹匏土革木也言堯聖德廣大恩澤隆厚
故四海之民思慕之深至於如此也儀禮圻內之民爲天子齊衰
三月圻外之民無服今應服三月者如喪考妣應無服者遏密八
音註意深切著明豈惇親王等全未寓目不加體察乎况虞書二
語係指帝堯而言並非指帝堯之后不學無術信口亂談惟恭查
乾隆十三年六月初九日奉 旨副都統海昌奏熱河官兵接奉

部文副都統以下官員以上俱穿二十七日孝服兵丁摘纓二十七日俱過百日薤髮所辦甚是等因欽此此次既經長齡等詳查例案妥議著仍遵前旨王以下有頂帶官員以上均著百日後薤髮期年內停止宴會音樂軍民人等均著一月後薤髮百日內停止宴會音樂其在京旗人著照乾隆十三年熱河兵丁之例俟百日後薤髮其餘東三省暨各省駐防及京城外之寶坻縣滄州等處小八旗兵丁俱仍著一月後薤髮毋庸更改至惇親王縣愷來園具奏時痛哭流涕並奏稱四人共商意見相同妄加援引若將伊等照大不敬律治罪伊等自思能當此重咎乎惇親王縣愷禮恩文慶裕誠著交宗人府吏部嚴加議處此係朕姑從寬典僅予薄懲將此通諭中外知之○癸巳以奕澤爲左副都御史由通政使還

○乙未

上詣觀德殿

大行皇后梓宮前行大祭禮○

上臨

故伊犁將軍玉麟第賜奠○丁酉諭本日吏部會同宗人府嚴議
惇親王縣愷等分別降調罰俸均屬咎所應得前據惇親王縣愷
面奏與禧恩等共商軍民人等薙髮停止宴會音樂之處於義未
協並未體察註義妄加援引不學無術信口亂談糊塗紕繆已極
朕若將伊等照大不敬律治罪伊等能當此重咎耶試觀見在

大行皇后之事較之嘉慶二年儀文已有過當之處因時制宜實
不得不然耳朕心深覺不安而抱慟且朕孝養 皇太后時祝無
疆之慶卽朕之春秋亦未甚衰乃縣愷等曉曉以天下應百日不
薙髮爭辯是何肺腑實出情理之外惇親王縣愷著革去內廷行
走並革去都統罰親王俸十年分作二十年坐扣每年仍賞給親
王半俸禧恩著革退御前大臣戶部尚書所有總管內務府大臣
印鑰交耆英佩帶並著耆英管理奉宸苑事務禧恩毋庸管理文

慶係翰林出身虞書二語註義深切著明若竟不知則學問亦太淺薄若知而不言大臣遇此等事不肯開誠布公隨聲附和尤屬非是文慶著革去副都統降爲三品頂帶裕誠著革去護軍統領退出乾清門禧恩文慶裕誠部議降三級調用之處俱著加恩改爲降四級留任六年無過方准開復此係朕姑從寬典僅予薄懲惇親王縣愷等當知感知懼勉圖後效無負朕諄諄訓誡之至意○調穆彰阿爲戶部尙書博啓圖爲工部尙書以禧恩爲理藩院尙書○己亥 上詣觀德殿 大行皇后梓宮前行周月祭禮○楊芳奏查明此次同時滋事分起爲首各堡兇頑尙有甘戶移等哨聚老木孔山峒嚙嚙崖老林派遊擊王連元等帶兵赴山峒接擒因峒形紆曲攀藤附葛搶近峒門生擒甘戶移等遊擊包相卿帶兵往嚙嚙崖夷巢奮力分投兜截老木孔及嚙嚙崖首惡悉行

殲除其萬家石十二地熟夷攜眷投誠令其自行指出殺人放火之犯立即正法投首男婦大小四百五十三名口俱各省釋其磨垛等處查拏奸宄撫字良善一律綏輯裁邊河北二十六地滋事夷匪業已廓清見添修船隻進勦河南十二姓又曲曲鳥野夷隨同滋事擬將裁邊掃蕩後即由該處前進查辦報聞○是月展緩直隸寶坻等十州縣被旱江蘇清河等十二縣衛積歉新舊額賦六月庚子朔日有食之○劉彬士以病免調朱爲弼爲倉場侍郎轉王楚堂爲兵部左侍郎以龔守正爲兵部右侍郎由左副都御史遷○癸卯諭軍機大臣等長清等奏開導霍罕夷使輸服筵宴賞資護送出卡一摺霍罕伯克前遣額爾沁密爾雜阿依普進卡求立商頭並欲向別部落抽稅經長清等派章京會同阿奇木伯克等隨時前往開導反復曉諭該夷使自知理屈無可置辨適因交易事

竣懇求出卡並稱以後遵照舊章貿易不敢妄求長清等又傳見
宣諭以爾等既知悔過姑且免究並令告知霍罕伯克以後當知
感知懼畏受厚恩斷不可以非理之事妄生希冀該夷使伏地碰
頭自認糊塗甚爲帖服隨即筵宴酌賞元寶綉段茶葉等物差派
弁兵伯克回子護送出卡並以該夷人見雖恭順似無變更究竟
犬羊性成其心叵測不可不時加防範以絕其覬覦所見甚是該
夷使既經輸服歸誠該伯克以後自可安靜照常貿易萬一覬覦
復萌稍存窺伺難保不別滋事端該參贊等務須督率將弁操演
兵丁巡查卡倫內外仍通行各城辦事領隊大臣等一體勤慎操
防並豫籌儲蓄糧餉務期兵精糧足以逸待勞聲勢聯絡互相應
援方爲有備無患○乙巳申禁各省將弁等違例坐轎○戊申調
光聰詣爲直隸布政使以色卜星額爲甘肅布政使戚宗彝爲甘

肅按察使

江由廣西左

○庚戌申禁粵洋民人以紋銀易貨洋人以

洋銀易貨○乙卯諭御史朱嶧奏請慎重名器一摺所奏甚是

嘉之至國家設科取士三年大比錄其文藝優長者試於禮部量

才而後官之並於正科之外開設恩科原以嘉惠士子甄拔真才

以備朝廷任使上年畿輔荒旱收成歉薄節經賑糶頻施而春雨

未透百姓嗷嗷待哺該地方官倡議勸捐適有直省紳士捐輸經

該督府尹等奏請朕因花翎以待軍功未便率行賞給而該員等

不分畛域急公好義亦不能不量予獎勵是以倣照年老諸生未

經登第賞給舉人副榜之例分別辦理姑允所議原係一時權宜

未嘗著爲定例也若如該御史所奏未登仕版者將可報捐中書

已列部曹者又將保送御史甚至買通關節雇倩槍替識趣日卑

術業漸廢生富人僥倖之心阻寒儒進修之志亦不可不防其漸

嗣後各直省督撫及順天府尹等偶遇水旱偏災如有摠誠捐輸應須嘉獎之處在士庶或酌給匾額或議敘職銜在官紳或准其加級或予以升途槩不准請賞舉人即使援引成案妄行演請亦斷不能仰邀允准其已經賞給者如有關節槍替等弊國法具在亦不能因加恩在先槩予寬宥朕於勸善之經求賢之道總期並行不悖該士子等務須經明行修敦崇實學自然登進有階無妄生冀倖之心也○丙辰諭軍機大臣等楊芳奏十二地熟夷投首義邊全境廓清擬卽進兵曲曲烏石圈子勦辦野夷情形一摺據稱遊擊王連元包相卿等分路進兵並抵鹽井溪該夷匪遁入石圈子老林該提督率領參將樊豐年等帶兵渡河至鹽井溪包相卿等帶領夷人男婦千數百名伏地跪迎慮及夷性狡黠兵撤復叛若驟加勦洗又恐其投匿抗拒密派義勇混入曲曲烏夷巢宣

示利害又遣投誠熟夷潛入二十六地曉諭恩威散其黨與該夷
匪見兩路官兵同時鈔到據其腹心又見先來投誠之賊目海潮
舉等未加誅戮遂出投誠念其尙知悔懼且有竄入曲曲烏石圈
子等餘匪或意存觀望自應網開一面因將巨憝海色汪等十數
人扣留隨營暗爲管押擬卽進兵曲曲烏石圈子搜捕餘匪等語
該夷匪海潮舉海色汪及鹽井溪投首之夷匪等雖已投誠然狼
子野心殊難深信其前次順江場等處慘殺居民挖墳墓戕害
兵丁周國棟等多名實屬窮兇極惡且未經官兵懲創雖出投首
難保其不終反覆該提督久歷戎行必能情僞周知務須力加鈐
束毋稍疏虞至見在進兵曲曲烏石圈子等處該夷匪等如果冥
頑梗化自應迅速勦辦毋得稍有遲延以致老師糜餉○己未以
潘錫恩爲左副都御史

由宗人府
府丞遷

○甲子諭福建陸路提督馬濟

勝上年帶兵二千渡臺剿賊以少勝眾十戰成功前經賞戴雙眼花翎交部優敘並賞給二等男爵世職用獎忠勤茲據程祖洛奏該提督所帶漳泉兵丁素稱勇健每多桀驁不馴該提督訓練有方善於駕馭自渡臺以來迄今半年未聞一卒滋事於此益見該提督之忠勇嚴明可嘉之至朕特親書忠勇嚴明四字扁額頒給該提督祇領以爲著績戎行認真整飭營伍者勸○諭程祖洛奏臺灣營務情形一摺據稱臺灣營務大弊在於不勤訓練不守汛地上年護遊擊周進龍等督兵擒捕匪徒中途遇賊官兵開礮不能出聲以致爲賊所乘如果平時訓練精熟臨陣何至於此又劉廷斌在任多年竟未知城守營右軍守備應駐下加冬地方其各營兵房又多倒塌兵丁借居民房竟有離汛貿易倩代當差值宿種種不法情弊劉廷斌以專閫大員沿習相循罔知振作所司何

事實屬孤恩溺職著交部嚴加議處○臺灣逆首陳辦等伏法○

乙丑以恩特亨額署盛京工部侍郎

前任湖南布政使

○戊辰

上詣觀

德殿 大行皇后梓宮前行二周月祭禮○是月貸直隸博野等

三縣雹災籽種展緩河南河內等八縣新舊額賦

東華續錄

道光二十八

臣王先謙敬編

臣周瀚蕃恭校

秋七月己巳朔諭朕勤恤民隱思日孜孜總其成於上而分其任於督撫爲大吏者果能體朕之心爲心以民之事爲事正己率屬賢者知所勸不肖者知所懲吏治自日臻上理上年臺灣逆匪張丙等滋事其始因搶米起釁經吳贊牽控張丙該縣不辦包米轉出賞格查拏張丙其陳辦因搶芋搶牛起釁攻打粵莊事本細微若得一良有司秉公辦理自可息爭弭釁乃邵用之不協輿情呂志恆果於自用遂致戕官攻城竟同負嵎之勢及訊問該逆因何造反尙稱地方官辦事不公雖係該逆一面之詞如果循聲卓著該逆等何能藉口總兵劉廷斌訓練不動營伍廢弛該道平慶雖

操守尙好而不能防患未然咎無可追是以將劉廷斌平慶俱交部嚴加議處總督係特簡大員文武俱伊統轄若使孫爾準其身尙在朕必加以懲處不少寬貸姑念該逆等尙未潛據城邑滋蔓難圖一經馬濟勝帶兵渡臺旋就撲滅邵用之等亦無貪婪劣蹟總督程祖洛未經到任巡撫兼署總督魏元烺爲時未久姑從寬概免置議此係朕格外施恩儻邵用之等有貪黷實據或張丙等燎原難撲亦斷不能曲加寬貸嗣後督撫大吏總須以察吏安民爲當務之急遇有不肖官吏破除情面立即參劾勿稍瞻徇若再因循疲玩因細故而釀成大患勞師動眾誤國殃民朕必將該督撫拏問從重治罪決不寬貸毋謂訓誡之不早也○以加恩舊學賜陳萬全孫汝楨舉人○庚午諭瑚松額等奏前任提督王得祿親赴嘉義各莊勸諭紳耆聯莊捕匪並親督家屬義勇捐貲購獲

計先後擒獲要犯張紅頭等並餘匪二十餘名等語該提督始終
勤勉爲國宣勞洵堪嘉獎王得祿著加恩賞加太子少保銜以示
朕眷念勳勤至意○諭本日據兵部嚴議前任福建臺灣鎮總兵
劉廷斌請照溺職例革職劉廷斌以專閫大員歷任多年並未知
城守營右軍守備應駐下加冬地方其各營兵房倒塌兵丁賃居
民房竟有離汛貿易倩代當差值宿情弊沿習因循罔知振作及
至逆匪張丙等分股滋擾該鎮有兵二萬餘人不能登時撲滅迨
馬濟勝帶兵二千渡臺立即蕩平是該鎮兵數雖多竟不足恃上
年廣東猺匪滋事已革提督劉榮慶平素不能整頓營伍致兵丁
臨時不能得力朕卽將劉榮慶革職發往伊犁充當苦差此案劉
廷斌平日不勤訓練營伍廢弛本應比照劉榮慶從重治罪姑念
其守城數月尙有微勞著照部議革職免其遣戍○丙子調何淩

漢爲吏部右侍郎桂齡爲戶部左侍郎轉陳用光爲禮部左侍郎

以陳嵩慶爲禮部右侍郎

由內閣學士遷

○丁丑諭五城坊官拏獲鄰境

逃犯必須本任無承緝未獲之案方准奏請議敘○定陪祀不到

參處例○辛巳諭瑚松額等馳奏臺灣逆匪蕩平一摺覽奏欣慰

之至此案臺匪滋事始於十二年閏九月當嚴冬寒冽之時海上

文報遲滯所調官兵或候風久泊或遭風漂散不能及時登岸自

瑚松額程祖洛先後渡臺人心鎮定督同馬濟勝等搜捕餘匪和

衷共濟將帥用命復出示曉諭散其脅從黨羽又擒獲大股賊首

並賊目多名分別辦理全臺安堵於本年五月全功告竣各莊仍

復舊業官兵陸續凱撤歸伍迅速藏功實堪嘉尙瑚松額著施恩

賞加太子少保銜程祖洛著施恩賞戴花翎仍各交部從優議敘

以示獎勵○甲申

御試翰林詹事官擢田嵩年等三員爲一等

餘升黜留任有差○己丑諭楊芳奏疊次攻克險隘石峒曲曲鳥等處野夷繳械投首全境廓清一摺覽奏欣悅此次野夷滋事業將清溪越嶺我邊等處剿捕完竣經楊芳帶兵進剿曲曲鳥石圈子野夷由窪拖至大坪林箐茂密道路險削連日攻克布益頭二三道溝腦趕至大坪山梁進破窩石爬崖偏崖各峒直抵烏斯坡峒卽曲曲鳥夷地該夷尙敢抵死抗拒我兵奮勇攻擊拾過險隘一擁直前擒剿賊匪多名滾崖跌斃男婦甚眾搜獲刀矛器械悉數焚毀糧石牛羊分賞將士各野夷聞風震懾石圈子夷目里維保先後帶領該夷一百五十餘名曲曲鳥頭人甲興等帶領該夷一千一百四十餘名並率領附近曲曲鳥之新津古等夷分起繳械投首該提督諭令各降夷自行指證將隨同熟夷焚搶之阿黎羊書等一百三十餘名提出訊明並將賊目逃兇一同正法該夷

等環視行刑咸知畏服所辦甚屬可嘉楊芳著賞給白玉翎管一件白玉搬指一箇黃辦大荷包一對小荷包四箇並發玉柄小刀六把象牙柄小刀四把大荷包十對小荷包十箇著分賞出力將士所有攻克險隘石峒之奮勇弁兵及轉運各員著鄂山會同楊芳查明擇其尤爲出力者酌量奏請鼓勵毋許稍有冒濫傷亡弁兵並著查明具奏○定大考翰詹臨期告病卽行開缺例○壬辰冊諡 大行皇后爲 孝愼皇后○朱桂楨以病免調祁墳爲廣東巡撫以惠吉爲廣西巡撫花杰爲福建布政使調蘇廷玉爲四川按察使以牛鑑爲山東按察使

由雲南糧道遷

○乙未諭富俊奏請禁陋習以端仕進一摺國家鄉會兩試原係求賢大典其主考同考各官特經簡派於文藝之優劣卽可知其品學之高下使得士皆砥行立名方合以人事君之道在獲中者感主司知遇拜認師生

原屬例所不禁銜文者總當以品學相規不得徒以恩情相接若如該大學士所奏科甲所認師生凡遇一切事件無不暗爲關照及門生外升道府州縣於師生同年處所必須留贈銀兩名曰別敬以致不計利息重輕甘受奸商盤剝是服官之始已負重累尙安望其能清白自守克爲廉吏耶至在京部院司員經堂官保薦京察簡放外任及外任各員經督撫保舉皆當秉公遴選務在得人其拜認師生久經嚴禁儻以保舉爲市恩酬報地步是受爵公朝拜恩私室此風斷不可長嗣後內外臣工於考試所取之士及保舉所屬人員務當破除情面力挽頽風如有仍前餽送別敬者一經發覺定予嚴懲決不寬貸至簡放外任各員旣已別無糜費則資斧易於措辦且例准在部借支養廉但能節儉自奉卽可無需負債著步軍統領順天府五城各衙門出示嚴禁如有奸商出

放官債者除將該員照例議處外並將重利盤剝之人治以應得之罪仍追銀入官庶儉可養廉吏治蒸蒸日上朕實有厚望焉○丁酉諭軍機大臣等吳邦慶奏東省蜀山湖水勢異漲居民盜挖石隄並未過水業已搶護平穩一摺據稱七月初六日子時突有蜀山湖鄉民數十人由湖駕船十餘隻駛至湖隄手持長槍施放鳥槍攔截行人動手挖隄署鉅嘉汛主簿俞皋在彼防守立刻鳴鉦齊集兵夫前往查拏奸民等遙見燈光卽上船放槍四散逃竄當查嘉字十七號隄頂挖長五丈五尺深五尺二寸並挖去大石一丈一尺裏石四丈五尺石縫間有滲漏該廳聞報趕到卽時填築不至宣洩湖漭該管運河道敬文因衛河斗長先赴臨清聞信馳回履勘已飭該廳汛速將被挖石工照舊培補詳詢近處居民僉稱湖之東北有邵家莊及汶上縣各村莊地皆窪下或係該處

民人所爲等語國家歲費數百萬帑金修理河湖通漕利運保衛民居上年南河于家灣有奸民聚眾強挖官隄之事迄今首犯陳端尙未獲辦此次東省蜀山湖復有奸民糾眾持械乘夜盜挖該湖爲運河東岸最大水櫃宣濟北行軍船每年請帑興修甚關緊要若非立時知覺趕緊培修必致湖漕斗瀉貽誤重運並據另片奏東省捕河廳屬壽東汛運河東岸滾水石壩外該廳捐貲加築土圍堰一道六月初九日夜閒有壽張縣民人張聞雅私將土堰挖開登時拏獲柳賁究辦甫經堵築於是月二十六日復有西岸鄉民率眾持械蜂擁強挖衝塌過水並將該廳自辦料束蘆纜縱火焚燒圍堰之設既爲慎重漕行擅汶敵衛起見豈可任聽鄉民自行擅動廳員自購之料卽非請帑亦係官物豈容恃眾焚毀奸民督不畏法幾至相習成風總因陳端未能立即梟示河干所以

密速訪拏通飭所屬一體查緝務將各犯迅速就獲分別首從嚴行懲辦不得以湖隄尙未過水漕行無誤稍涉鬆懈儻日久無獲致令遠颺卽將該地方官嚴參懲處該撫亦不能辭重咎也○召岳良來京以何煊爲山西布政使圖明額爲雲南按察使

由甘肅蘭州道

○是月賑貴州古州等四廳縣水災

八月己亥朔伊里布奏越南水尾土州於四月間夷匪蜂起探係黎維那族人黎維煥先受封職被殺黎維良黎維然等與北勝土司郭必功郭必在等由清化起事直趨興化富春各處土夷煽惑該國調兵禦捕報聞○辛丑 上詣觀德殿 孝慎皇后梓宮前行百日祭禮○癸卯諭會典內載皇后母家例俱應封公爵其不

係嫡后及誕聖推恩所封侯承襲時請旨等語若是轉致參差不
能盡一且無限制嗣後嫡后之父及誕聖推恩所封者俱著封爲
三等承恩公其不係嫡后者著封爲一等承恩侯皆世襲罔替並
著將此旨纂入會典則例永遠遵行○甲辰麟慶百日孝滿命署
江南河道總督張井俟麟慶到任回籍調理○丁未以何彤然爲
內閣學士兼禮部侍郎銜由詹事遷○癸丑奉 皇太后懿旨晉封
全貴妃鈕祜祿氏爲 皇貴妃攝六宮事○乙卯鍾祥奏拏獲盜
竄蜀山湖首犯邵方有等○是月加賑貴州都江等二廳水災
九月己巳 上詣觀德殿 孝慎皇后梓宮前行啓奠禮○庚午
奉移 孝慎皇后梓宮於田村 上親臨目送○壬申 上至田
村 孝慎皇后殯宮前奠酒○乙亥楊芳奏四川夷匪清溪峽邊
及曲曲烏石圈子等處疊經剿撫完竣惟越嶲廳屬逃匿兇夷及

河外野夷曾經出巢滋事必應搜捕淨盡馳抵越嶲後督飭將弁
搜獲兇賊窩列等正法其著名兇夷多於河外野夷地方藏匿查
明野夷中巴姑阿路二支兇玩最著該夷巢山險路歧爲眾夷出
入門戶稔惡熟夷藉爲匪徒淵藪當卽移營渡河徧傳安分之吉
施等十九支頭目先行安撫巴姑阿路二支畏罪後到對眾數其
罪惡眾夷願爲嚮導請兵剿洗參將王玉林等進剿巴姑殺賊多
名生擒賊目阿別等副將何占魁等分路夾擊阿路該夷奔竄老
林焚投殆盡該頭目哋却曾經率同眾百戶自行投見尙知畏罪
貸其一死交土百戶嚴加管束吉施土百戶等獻兇夷十六名內
哋基則等父子二人爲黑瑪溪滋事首犯松光林什別一支該頭
目患病亦遣其妻出巢迎見極爲畏懼將所獻兇夷分別正法暫
留兵千五百名分布彈壓餘兵全撤歸伍奏入晉封楊芳一等果

勇侯交部優敘賞花杰花翎○乙酉展緩福建全省通賦○丙戌

以張岳崧爲湖北布政使

由唐事遷

○辛卯以李恩繹爲廣東按察使

由長蘆鹽運使遷

○壬辰以貴慶爲熱河都統調嵩溥爲漕運總督史譜

爲貴州巡撫以楊名颺爲陝西巡撫調何焯爲陝西布政使以徐

鏞爲山西布政使

由大理寺卿遷

○甲午免雲南昆明等十州縣地震災

本年額賦並予賑○丁酉諭陶澍奏查緝漕船夾私正以速趙回

空未使任帶蘆鹽致使鹽漕兩誤一摺所議甚是前據貴慶奏籌

議江廣回空軍船酌增食鹽給課交票章程五條朕卽覺其不可

行惟以鹽漕並重不厭精詳當交部議旋據戶部奏增買蘆鹽有

妨淮引降旨令陶澍悉心妥議茲據該督於未奉諭旨之先接該

漕督咨文卽力陳誤鹽亦且誤漕甚爲明晰漕船回空帶私爲歷

來之痼弊並有隨幫風客除本分利坐占淮南數十萬引綱額句

引梟匪肆行無忌漕船停泊買私尤有誤於趲運前經陶澍派委文武大員於黃河南北及淮揚等處嚴密迎查並令漕員會同押空幫弁於直隸山東隘口認真堵緝卽寓催趲於查緝之中回空歸次亦較前迅速糧私旣絕官引自銷江廣等省雖連值水災銷數尙增本年漕船實由兌運艱難以致稽緩儘可嚴行催趲以速補運若將漕弁撤退則幫丁舵水人等俱知禁令已弛必致放膽買鹽明縱透漏旣害漕綱欲速反遲尤誤漕運至該漕督請於例買食鹽四十斤外請在長蘆加買過揚納課不但有誤回空並且有誤重運漕務水手素稱桀驁加以順帶官鹽必有梟犯出貲附和以天庾正供之船爲聚集匪黨之藪且所賣盡長蘆之私所缺盡淮南之課實爲自壞藩籬至丁情苦累准帶土宜津貼以漕綱爲丁舵沾潤之計國家無此政體著直隸總督山東巡撫長蘆鹽

政天津鎮總兵仍嚴督沿河營汛州縣查拏梟匪窩囤堵截私鹽
透上漕船並著漕運總督仍派幹練漕弁於各要隘會同幫弁堵
截接查其有已經議撤者仍行添設不准帶私停留務期迅速南
下其楚西綱岸不至於歉歲滯銷之後再受糧私侵占並著責成
陶澍實力整頓以期鹽務日有起色不至滯銷庶鹽漕均有裨益
○是月賑江蘇上元等六縣水災緩徵山東鄒平等三十三州縣
衛河南榮澤等二十一縣江西南昌等二十二縣水災蠲災新舊
額賦

冬十月丁未命瑞郡王奕約在內廷行走賜名奕誌○丁巳賜牛
鳳山等三十八人武進士及第出身有差○命訥爾經額等飭緝
湖北濱江等處盜匪○己未論向來武會試內場取中試卷先於
雙好字號內選取如不足額再於單好字號內選取是以各武舉

試卷彌封後仍送外簾御史各照原箭冊印明雙單好字號馬箭
地毯步箭弓刀石於各卷面上分六項填註移送內簾以憑去取
此定例也武科之設以外場爲主其弓力強弱尤足定其優劣至
馬步箭本有一日之長短第能合式自可命中卽如朕御紫光閣
試中式武舉馬步箭其能全中者再閱時未必仍能疊中至獻寫
武經又其餘事斷不能憑此爲去取本科會試特派白鎔胡達源
爲正副考官宜如何認真考覈爲國求材乃殿試後特命軍機大
臣覆覈箭冊除貴州本無雙好此次中式單好武舉王家燮陳正
坤應無庸議外辰字圍福建武舉見有雙好一名取中單好許逢
時一名陝甘有雙好四名除呂廷魁丁定國二人中式外取中單
好馬興臨一名宿字圍滿洲蒙古有雙好五名除慶喜隆山雅爾
胡善三人中式外取中單好烏和哩一名列字圍山東有雙好六

名除紀冠宜府汝潯模夢麟三人中式外取中單好楊雲鳳一名
廣東有雙好五名除韓南輝何如啓二人中式外取中單好李達
元池化鰲二名此數人俱僅開十力弓惟烏和哩開十二力弓及
派員覆試又復不符其馬興臨許逢時二人覆試弓亦不符尤不
可解究竟該考官等置雙好而中單好以何爲憑若以中箭多寡
爲辭則陝甘雙好中均係馬步全中何以舍此取彼若以默寫武
經爲去取則是重其所輕伊等有心枝梧欺飾強詞奪理其咎更
重至內簾監試御史蘇芳阿給事中黃爵滋試卷原不寓目亦不
應干預考官取中之事第見有雙好字號考官取中單好出闕後
卽應據實劾參何竟緘默不言亦安用此監試爲耶白鎔胡達源
蘇芳阿黃爵滋俱著單銜各具摺明白回奏不准會商連銜○辛
酉諭本科武會試正副考官白鎔胡達源取中武舉有置雙好而

中單好者監試御史蘇芳阿給事中黃爵滋出闕後並未據實參劾昨降旨令白鎔等各具專摺明白回奏茲據白鎔等先後奏覆白鎔自認錯誤強爲說辭衡材大典斷不容稍棄舊章任意去取似此錯謬非尋常疏忽可比白鎔著先行開缺交部嚴加議處胡達源則稱伊所取中之卷並未置雙好而中單好惟於白鎔中卷錯誤未能查覈更正正副考官皆朕特加簡任必應公同商酌中卷如此錯謬亦屬咎無可辭胡達源著一併交部嚴加議處至蘇芳阿黃爵滋均稱未能查明參處實屬不合俱著交部議處○以湯金釗爲工部尙書吏致儼爲左都御史轉姚元之爲刑部左侍郎以趙盛奎爲刑部右侍郎楊簧爲江甯布政使趙炳言爲湖南按察使

由廣東惠潮嘉道遷

○甲子陶澍奏獲盜決官隄首犯陳端命與待

質案犯陳欽劉開成等質審明確押赴犯事地方正法○乙丑諭

本日據吏部奏嚴議武會試正副考官白鎔等分別降調降留均屬咎所應得歷科武會試內場取中試卷先於雙好字號內選取如不足額再於單好字號內選取此定例也本科會試特派白鎔胡達源爲正副考官自當認真考覈以備干城之選乃置雙好而中單好至有六名之多及至派員覆試許逢時馬興臨烏和哩均以弓力不符停科其未經停科之楊雲鳳李達元池化鰲均以衛守備用可見此次中式單好武舉六名拔藝俱極平常其外場監射較射王大臣考校尙屬秉公並未屈抑人才而白鎔等悍然不顧以千人共見之技竟至上下其手實不平允朕不爲已甚姑勿深究白鎔著降補大理寺卿胡達源著降補翰林院侍講以示薄懲御史蘇芳阿給事中黃爵滋部議降二級留任之處均著加恩改爲降一級留任不准抵銷此係朕量從寬典該員等當知感知

懼勉圖後效嗣後武會試揭曉後宜如何做照文會試之例派員將取中各武舉比對監射較射各冊覆加磨勘之處著兵部妥議章程具奏○丙寅諭前因武會試正副考官白鎔等置雙好而中單好屈抑人才已降旨將白鎔等降黜矣朕查閱直省未中雙好各武舉內陝甘雙好武舉馬步霄馬上中七矢步下中六矢刀石俱係頭號較之單好中式罰科之馬興臨實爲過之朕不忍任其屈抑致令向隅馬步霄著加恩以營守備用附於本科武進士之後銓選其未補缺以前仍准其一體會試○是月賑江蘇上元等十二縣衛湖南安鄉華容二縣直隸曲陽縣黑龍江等三處災民加賑湖北武昌等六縣水災給安徽懷遠等六縣災民口糧緩徵直隸曲陽等十一州縣安徽懷甯等四十一州縣衛湖北黃岡等二十九州縣陝西葭州等十七州廳縣湖南安鄉等八州縣江蘇

上元等六十州廳縣衛兩淮富安十場雹災水災旱災新舊額賦
墨爾根等七處道款展緩兩淮劉莊伍佑二場通糧

十一月丁卯朔諭武科爲掄才大典所有派出監射之王大臣宜
如何公平考校以副朕求才若渴之心歷科中式武舉俱有能開
出號弓者是以一甲進士卽在此內挑取上年壬辰科中式武舉
雖有出號弓而比較馬步箭及刀石技勇之優劣拔取一甲一名
李廣金係十二力本科朕親試中式武舉內牛鳳山孫和平俱報
開十二力弓朕見其從容引滿因賞給十三力弓仍能開滿可見
此中不乏人才皆由監射較射之王大臣自願考成慮覆試殿試
時弓力不符先爲此避重就輕之舉武科大典竟無一出號弓成
何事體若使牛鳳山等竟不能開出號弓朕憑何取中一甲武進
士乎嗣後各直省考試武場當認真挑取練習挽強之技其派出

監射較射之王大臣等務須秉公校閱爲國求才用備干城之選
不得規避處分屈抑人才豫爲弓力不符地步再八力弓係屬三
號歷科閒有備數充選之人究非上乘本科會試中式武舉陳正
坤常奎基余碧元王家燮俱係開八力弓未免過多甚不出色嗣
後有似此開八力弓而刀石並無頭號者該王大臣等卽不准挑
入好字以杜倖進而拔眞才○庚午諭本日常審句到情實官犯
內奎秀福英阿一起常犯庫書史禹亭一起法無可寬均已予句
處決矣此案奎秀福英阿身任庫官均有監臨之責聽信戴雲峰
等虛出通關截留侵蝕各分用銀一千兩庫書史禹亭膽敢勾串
官吏舞弊婪贓刑部定案時有完贓不准免罪字樣不得不執法
懲治以儆貪邪前經刑部奏該犯等均於定案後陸續完繳贓銀
彼時若不准其呈繳恐豫先漏洩風聲因而畏罪自戕轉致倖逃

法網是以未經駁斥第法不可廢不能以業已完贓稍從末減今各該犯均已明正典刑所有奎秀福英阿史禹亭完繳贓銀均著擲還交其家屬領回○乙亥怡良丁憂以陳鑾兼署江蘇按察使由布政使兼署○丁丑盧坤奏越南國黎維良糾合北勝土司在清化起事保樂州農文雲聚黨攻打收馬九月初諒山鎮夷官黃文權帶兵救援敗績沿途雖設有排柵地方遼闊兵力少單見派兵嚴防隘口報聞○庚辰復琦善頭品頂帶○甲申諭御史尙開模奏請飭禁幕友濫邀議敘一摺朝廷甄敘之典所以鼓勵人材其襄理幕務由本官自行延請與在官供職不同朕曾通諭各督撫鹽政等概不准將幕友保列以杜冒濫前據盧坤奏請將襄辦文案出力之幕友候選州同宋緒加以獎勵朕因係五品虛銜與授職稍有區別是以降旨准行今該御史奏此端一開各省相率效尤將

有職人員延入內署商推公事以爲將來保薦地步其需次各官

藉此資緣招搖均所不免實不可不防其漸所有候選州同宋緒

實給五品銜之處著卽撤銷盧坤違例奏請並著交部議處嗣後

各直省督撫概不准以本省屬員入幕襄理如再有以幕友濫行

邀請議敘者著吏部查明參奏以重名器而肅官常○丙戌 上

詣 大高殿祈雪○以史譜爲光祿寺卿裕泰爲貴州巡撫調恩

特亨額爲刑部右侍郎以烏爾恭額爲盛京工部侍郎圖明額爲

奉天府府尹錢寶琛爲雲南按察使

田長蘆鹽運使遷

○以李羲文爲四

川布政使莫爾廣阿爲陝西按察使

田廣西右江道遷

○裁東河榮澤縣

北岸主簿汲縣縣丞堂邑縣丞通聞官○戊子修浙江海塘○丙

申定湖南苗生鄉試隔別號舍例○是月給江西德化等三縣浙

江開化縣水衝民房修費緩徵吉林三姓地方甘肅皋蘭等二十

七州廳縣浙江海甯等十四州縣被災新舊正雜額賦

十二月辛丑諭本日召見福建陸路提督馬濟勝年屆七旬精神強固朕心甚爲嘉悅上年冬閒臺灣逆匪張丙等聚黨滋事分股肆擾戕害官弁惟時全臺官兵一萬四千餘名不能得力該鎮等嬰城固守請調兵三萬赴援馬濟勝經魏元烺派往獨帶兵二千渡臺接仗身先士卒所向克捷以少勝眾十戰成功各股賊匪紛紛潰散逆首陸續就擒不煩內地兵力當瑚松額等未經渡臺以前全局戡定厥功甚偉前經賞給御書忠勇嚴明四字扁額二等男爵世職雙眼花翎茲來京陛見允宜優加懋賞篤眷酬庸馬濟勝著加恩賞晉二等子爵世職在御前侍衛上行走紫禁城騎馬並賞御書福壽字各一方寶藍緯絲蟒袍一件纓緯兩匣大卷八絲段兩件大卷江紬兩件頒給祇領以獎忠勤再臺灣一役福建

巡撫魏元烺於奏請調兵時稔知臺灣府城爲根本重地一面奏
聞一面派馬濟勝帶兵前往迅奏膚功辦理甚合機宜魏元烺著
賞戴花翎仍交部從優議敘以示朕論功行賞權衡至當之意○
乙卯 誠禧皇貴妃薨○丙辰諭前據保昌等奏吉林三廳紳士
捐貲建立考棚請令學臣按臨考試一摺朕卽覺其不可行當交
禮部議奏意該部必將該將軍等所奏議駁方爲正辦乃本日據
禮部奏該處自設立學額以來見在民字號及滿合字號應試生
員若干名童生若干名均未詳細聲明儒人數較少驟令學臣前
往考試不獨來往跋涉尤屬徒擾驛站所有該處各廳見在捐建
考棚及讀書應試者共有若干人應飭交該將軍查明分晰開單
咨送到部再行覈議等語殊屬非是朕恭閱 列聖實錄所載俱
以我滿洲根本騎射爲先若八旗子弟專以讀書應試爲能必將

輕視弓馬怠荒武備其各省官弁子弟不准廢騎射本業該將軍副都統等通行飭諭訓課子弟以騎射爲首務其攻肄舉業者仍當嫻習騎射務臻純熟毋得專尙文藝 聖諭煌煌久已垂爲成憲自當恪守舊章況吉林爲我國家發祥之地非各省駐防可比尤宜以騎射爲重何得專以應試爲能轉致拋荒弓馬舊業卽謂有民人與試而國家承平百數十年吉林民風古樸正見其不染習氣何必以攻習舉業爲臻上理耶今欲添設考棚無論文風未必遽優卽使絃誦日增而弓馬轉致輒弱大非朕教育旗人之意也保昌等率爲此奏殊屬忘本關繫不小保昌倭楞泰禮部堂官俱著傳旨申飭所奏著不准行嗣後吉林士子仍著循舊例令其附奉天省寄棚考試總須恪遵 聖訓以嫻習騎射爲當務之急毋得習尙文辭轉漓淳樸以副朕黜華崇實之至意○丁巳

上至吉安所 誠禧皇貴妃金棺前奠酒○辛酉諭軍機大臣等
麟慶奏近年河湖交徹欲復舊制不外古人蓄清刷黃一法其關
鍵全在運口本年空運仍用灌塘自屬權宜濟運但河底淤高非
清莫刷湖水連年北行止以運河爲熟路一旦黃水落低開展束
清禦黃二壩暢放湖水運口無所箝制古人引導清水濟運刷黃
全在致力磨盤埽自廢棄後河務漸壞嘉慶年間建築蓋壩旋又
塌短不能得力今擬隱復磨盤埽舊制以備引清刷黃之用至湖
堰水寬工險臨湖各壩蓄水之時多封柴土至盛漲動輒損壞另
建糜費不貲應倣照滾壩成法分別勘辦又山盱五壩分消湖水
下游車邏等五壩分洩來源河水長符定制卽次第啓放水勢一
定亦卽堵合至於黃河情形查工時體察平險節可緩之埽段辦
緊要之土工以收刷深實效漫灘暗險用堵截支河之法飭屬照

辦至黃河底淤非人力所能强刷疏濬器具止可備運河挑挖之用黃河惟儲備料土遇險卽搶以防爲治等語所論頗爲正當該署河督務當體察河湖大局情形相度機宜隨時妥辦至河身淤墊日高如果清高於黃卽當啓放禦黃壩挾溜攻沙以資刷濬嗣後務須酌量情形於盛漲以前或將禦黃壩早放數月卽多收數月之功至秋冬以後水勢歸槽更宜相機啓放俾河身日益深通近年倒塘灌運究非正辦斷不可年復一年因循遷就致失事機

○甲子諭給事中金應麟奏漕船訛詐滯運累商一摺據稱江浙內河一帶長亙七百餘里每年漕船歸次之後凡商民船隻經過小則訛詐錢文大則肆行搶奪其訛詐之法或將漕船橫截河中往來船隻非給錢不能放行名曰買渡錢或擇河道淺窄之處兩船直長並泊使南北船隻俱不能行必積至千百號之多阻滯至

三四日之久有沿河地棍名曰河快向各船科歛錢文給付漕船令其抽單分泊以便各船行走名曰排幫錢道至受兌開行又另以捉船撥米爲名如遇重載商船該水手用糧米一石傾入船內非給費不能前行否則加以搶糧名目人船並鎖藉稱送官究治卽可得錢設遇無貨船隻卽留爲分載私貨之用並須送至清江交卸始得放回並有豫結數人故與商船尋釁不法水手從旁搶奪船戶稍爲理論卽擲棄水中毫無顧忌商民以州縣不肯查拏未敢上控州縣以兌米畏其挑斥置若罔聞其訛詐之處如嘉興府東門外之宣公橋蘇州府胥門外之虎銜許墅關之市河常州府之東西兩埠鎮江府丹陽縣之市河丹徒縣之月河閘豬婆灘都天廟大閘口等處最爲受累地方其所訛錢文每幫均有總頭收掌除彙總分派各船之外領運員弁之家丁差役人等多有分

肥等語江浙兩省漕船較他省爲多水手之强悍亦較別幫爲甚若如該給事中所奏漕船水手沿途訛詐擾累商民種種不法情弊必致遲誤重運爲害地方不可不嚴行懲辦著林則徐富呢揚阿嚴飭所屬於內河地方凡漕船停泊經行之處訪查積弊嚴行申禁如仍有前項弊端卽責成地方官隨時懲辦其徇縱之運弁立予參革以肅漕政而除民累○是月賑江蘇上元等十二縣衛水災展賑安徽銅陵等十七州縣水旱災貸江甯旗營江蘇撫標城守及太興等六營兵餉緩徵廣東南海等十一縣江蘇太倉等七州縣水災松江府屬場匭桃源等三縣窪地新舊額賦直隸河閒縣逋賦展緩浙江德清縣逋賦○是歲朝鮮越南琉球緬甸入貢○會計天下民穀數除福建湖南未報外各省通共大小男婦三萬九千八百九十四萬二千三十六名口各省通共存倉米穀

三千五十五萬五千七百一十五石六斗三升三合六勺